

**Zeitschrift:** Historischer Kalender, oder, Der hinkende Bot  
**Band:** 279 (2006)

**Artikel:** Oha lätz!  
**Autor:** Hofmann, Hermann  
**DOI:** <https://doi.org/10.5169/seals-657505>

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 14.08.2025

**ETH-Bibliothek Zürich, E-Periodica, <https://www.e-periodica.ch>**

# Oha lätz!

## *Dopplets Soupäch*

Hinderholzbräctu u Eggmattdänu hei verwiche Galgehogerchrigu, wo gäng echly hochnäsig isch gsi, gar en uflätige Streich gespilt u ne dermit ugäbig i d Stöck bbracht. Chrigu het mit em Moori wölle uf Chrattebüel fürefahre, zum Grossrat Schwarzenegger sym Eber, vowäge sy Frou, d Lisette, het ihm schon lang gseit, das mües jitz eifach sy, u si laai nid lugg, bis ume ne Räblete Färleni im Söistall desumefägieri.

Äntliche het Chrigu nahggä, u wo ds Moori eis Tags grad i der richtige Verfassig isch gsi, het er der Chalberchrome u ds Bockwägeli bereitstellt. Won er ds Moori us em Stall holt, sy i däm Momänt grad Hindernholzbräctu u Eggmattdänu bim Huus verbycho u hei Chrigu ghulfe, di wider-spänschtegi Sou i ds Gatter z trybe un uf ds Wägeli ueche z murggse. Wo der Chrome mitsamt der Sou isch verlade gsi, isch Chrigu i d Stuben ycheggange, für di besseri halblynig Bchleidig aazlege. I de Stallhose het er wäger nid guet uf Chrattebüel füre dörfe, u de no grad usgrächnet zum Grossrat Schwarzenegger.

Chuum het er d Chuchiture hinder sech zueta, het undereinisch Hinderholzbräctu der Tüüfel gstüpft, un är seit zu Eggmattdänu: «Du, wi wär's, we mer ihm jitz gschwind ds Moori ume täten uslade un ihm derfür der Motz, der ghiiuet (kastriert) Eber, i Chrome gheie? Was meinsch zu däm Güegi? Das gäbti für Chrigu ne rächte Dänkedel, wen er si därewäg würd blamiere!»

«Du bisch e Hagelshund», meint Bräctu, «Halunggestückli chöme dir de nahdisch gäng i Sinn. Aber mynetwäge, i cha ja mithälfe. Das git de öppis für Grossrat Schwarzeneggers Meischterchnächt; dä wird scho derfür

sorge, dass es gly di ganzi Gmeind weiss. Jitz aber tifig, süsch chönnt's üs no a Chrage gah!» Dermit lüpfe beid Galgevögel der Chalberchrome vom Bockwägeli ache, jage ds Moori umen i Stall zrügg u verlade hurtig-schwind der Motz.

Wo Chrigu isch zur Chuchi uscho, sy beid verschwunde gsi. Der Schutz isch ne nid hindenuise; Chrigu het rein nüüt gmerkt. Är isch ufe Bock uecheghocket, het der Mechanik glöst u – hüü! – gäge Chrattebüel füre isch der Choli trabet. Underwägs het der Fuerme es Pfyffli gstopfet un i eimfurt blau Wülchli usebbaffet. Äntlech isch Chrigu z Chrattebüel bi Grossrat Schwarzeneggers Burehuus aacho. Der Meischterchnächt isch grad vorusse gstande.

«So, chunsch is cho ne Bsuech mache?», fragt er. Galgehogerchrigu het ds Gilet über d Buuchründi acherzoge u bscheidet: «Ja, i bi mit em Moori cho. D Mueter het scho lang gchääret. We si äbe kener Färli im Stall het, isch's ere nid wohl. Si het's wi d Grosmueter: Die het albe gseit, es sygi eini nid e rächti Büüri, we's nid weissi u rochli im Söistall usse.»

«Guet so», meint der Meischterchnächt druuf, «de wei mer das Gusi uslade.» Si fahre mit em Wägeli hindertsi gägen Yfahrtssatz, tüe der Chromen uuf u buggsiere d Sou use. Da mues der Meischterchnächt ufdsmal greduse lache. Es überträölt ne fasch vor Gugle – u zu Chrigu seit er: «Was zum Gugger chunt di o aa? Lue, du bringsch ja der Motz statt ds Moori.»

Jitz isch bi Chrigu ds Füür i ds Dach gschosse. Vor Töibi verwörgt er fasch der Geislestäcken ir Hand u donneret los: «Di Uflät, was si sy! Däne Fötzle will i d Posch-tornig no bybringe! Das isch hingäge starche Tubak, eim däwäg ga z narre. Di Sidiane,

däne will i de zeige, wo Bartli der Moscht holt!»

Der Meischterchnächt het Chrigu gluegt z besänftige, innerlech het's ne aber schier putzt vor Fröid, u das, obschon er no gar nid het chönne wüsse, dass Chrigu gly einisch no grad e zwöite Schue voll wärdi usezie; denn eis Unglück chunt ja bekanntlech sälten alei.

Wo der Motz wider isch verlade gsi, isch Galgehogerchrigu losfahre, ohni en einzige Blick zrüggzwärfe. Är het i eimfurt em Draguner mit der Geislen um d' Ohre gchlepft, dass dä immer schnäller u schnäller trabet isch. Ds Bockwägeli isch über di ggrieneti Strass grasslet u ghouperet, dass es nume so tschädderet u gsyrachet u der Motz hinden im Chalberchrome gar ugäbig erhudlet het. Me hätt bald chönne meine, das Wägeli heig gegetti Redli. Di Schüttelbächerfahrt isch em Motzli ds Dräcks verleidet. Är het sech im Chromen ufgrichtet, di vordere Storzescheichli übere Chromerand usgha, mit de hindere verstellt u mit syne Schwynsöigli i di verbyflitzendi Landschaft usegluegt. Undereinisch nimmt der Motz e Ruck – u hopp! – im Strassegräbli isch er gläge. Ohni oppis z merke, isch Galgehogerchrigu mit sym Fuerwärch wytersgsprängt. Der Motz het's wüescht überwürblet gha. Äntlichen isch er ume uf d Bei cho. I di nächschi Matten use isch er gwatschlet, zersch fasch wi bsoffe, dür ds höchste Gras, u het bald hie u bald dert e Muuleten abgrupft. Das het's däm Guseli chönne!

Jitz isch Chrigu daheimen aacho. Är het ds Wägeli näbe hinder Stallygang gstellt, dass ömel niemer chönni zueluege bim Uslade. Uslade? Chrigu trifft fasch der Schlag – der Chromen isch läär! «O daas no! Die Blammaasch!», zischt's us ihm use. «Dä Donner mues usegjuckt sy», überleit Chrigu, stygt blitzartig wider ufe Bock ueche u git em Choli d Geisle. I vollem Ggaracho isch's der glych Wäg zrügg ggange. Wi ne ggölte Blitz isch der Draguner vorwärts gsprängt, u Galgehogerchrigu het derzue es ganzes Wörterbuech vo Flüech i d Wält usebbrummlet.

Undereinisch het er stillgha. – Dert äne imene Härdöpfelacher isch sy Motz gstande, het der Boden ernüelet un allpott mit der Schnouze es Hämpfeli Dräck i d Luft bbängget.

E Fäldmuuser, wo grad ir Neechi syner Falle kontroliert het, isch Chrigu cho hälfe, di Sou yzfaa. Derfür heig er schyns vom Galgehogerbuur grad e Zwoifränkler i d Hand ddrückt übercho, damit er de ömel gar niemrem o nume nes Stärbeswörtli sägi. Aber win



Wasserspiel Bundesplatz, einmal etwas anders fotografiert  
(Foto: Hansueli Trachsels)

es so geit: Bereits am nächschte Tag het me zäntume über beid Episode vo däre verun-glückte Söifuer glachet. U wäger di meischte hei bi sich sälber ddänkt, das gschehj Chrigu ganz rächt, vilich trag er jitz i Zuekunft d Nase echly weniger höch.

### Limpachliebu

Hütt isch Limpachliebu es eltersch Mandli. Sibezg Jährli hein ihm syner Haar versilberet u der Rügge gchrümmt. Aber chäch isch er nüüschi gäng no. Im Dorf inne gseht me Limpachliebu nume no ganz sälte. Es mues scho grad e Chilbi bsunderer Art sy, we me ne wott vo daheim ewäggbringe. Es isch ihm äbe dert am baaschte.

Früecher isch das andersch gsi. So vor zwäanzig, dryssg Jahre, da isch Liebu meh weder nid im Land umegstäcklet oder ggutschneret u het derby mängs Händeli gmacht u jedesmal es Schübeli Gäld heitrage, Glück het er bim Handle gha, nüüt als Glück. Ja-ja, das het er de nahdisch verstande, kei Zwöite isch ihm nachecho.

Aber einisch isch er doch amene Gfitztere i Lätsch trappet, u das isch er, nämlech am Grützegödu, wo i Händelerchreise ke guete Ruef gha het. Allerdings isch di Gschicht z gueter Letscht doch no eso verloff, dass Grützegödu isch blybe hange u Liebu het chönne i ds Pfüüschtli lache. Aber göh mer der Reie nah!

Grützegödu het ihm sälbisch es Fuchsli aatrage. Es het gar kei übli Gattig gmacht un isch Liebu uf Aahieb i d Ouge gstoche. Är het das Rössli vo allne Syte gschouet – u schliesslech es Bot ta. Derby het er nid grad z höch ggriffe. «Es soll gälte», seit Grützegödu – u der Handel isch gmacht gsi. Das isch du Liebu doch echly z tifig ggange, un är het där Sach nume halb trouet. Aber was het er anders wölle? Hindertsi druus het er nümme chönne. Nüüt isch ihm übrigbbibe, als mit sym Fuchs heizue z zottle.

Zmornderisch isch ihm du e ghöregi Stallatärne ufggange, potz Chrüzbatalion aben-

dere! Vor Töibi über sich sälber hätt er sech alli Haar chönnen usrysse. Vorwäge dä Fuchs isch e Füürtüüfel gsi, dass nüüt eso. Won er ne het wöllen yspanne, het dä undereinisch all Unarte zeigt u ta wi ne Uhund. Gschlagen u bbisse het er, was-gisch-was-hesch. Es sy keiner föif Minute verby gsi, isch scho es Landli abenandere gfahre. Ekei Dräck het er mit däm Chätzer chönnen aafa.

So isch das zirka drei Monet ggange. Der Fuchs het sech i keiren Art u Wys la ummodle. Du passiert's amene Samschtigzaabe, dass Grützegödu bim Limpachbuurehof verbyfahrt. Der Fuchs isch grad im Weidli gsi, u Liebu u no zwe ander sy bim Gartezuun gstande. «U de, wi bisch zfriede mit däm Rössli?», meint Grützegödu, het still u lächlet um d Muulegge. – «Prima, ganz prima», git Liebu zur Antwort. «No nie, im ganze Läbe nie, han i es settigs Ross gha. 's isch eifach es Tierli wi Guld. Nume schlächt erzoge hesch es, ganz schlächt. Han im Aafang nüüt dermit chönnen aafa. Bbisse u gschlage het's wi ne Sibechätzer. Hütt aber gäb i's nümme für viil. Es het si meh weder nid glohnt, süüberli mit ihm umzgah!»

Grützegödu het glost u glost u ds Muul vor Verwunderig halb offe gla. Nach eme Wyli seit er: «Gäbsch es ume, we der es schöns Profitli offeriere?» – «Nid dass i möcht», git Liebu zur Antwort, «es settigs Rössli, wo me jitz jede Schuelbueb dermit cha la gutschiere, isch eim nid wohlfeil. Nenei, i ha's mittlerwyle zwäggchlepft, win ig's wott ha, du bruuchsch mer's jitz nümme z vertüüfle.»

«He, la doch mit dir brichte. I gibe dir föif Napelion meh, als du mer hesch ggä.» – «Henusode, will du's bisch, der Fuchs ghört wider dir, dä Handel gilt», seit Liebu tifig. Är het der Gatter zum Weidli ufta, der Fuchs bim Chammhaar gno u ne em Grützegödu hinden a ds Rytwägeli bbunde. Dä het der Gäldseckel us der Gilettäsche gchnüüblet u der Chlütter füregmünzt.

Wo Liebu d Napeliöndler ir Hand gha het, isch es Grinse über sys Gsicht gflogen un är het zu Gödu gseit: «Jitz isch mer e Stei vom

Härz trolet, grösser als es Bachofehüsli. U was i no ha wölle säge: Chumm guet hei mit dym ufläätige Füürtüüfel ...!»

Bi Grützegödu het's taget. Är isch giftige uf ds Rytwägeli ueche ggogeret u mit eme züntrote Hübel dervoggutschiert. Limpachliebu het's nid chönne verchlemme, ihm schadefröidig nachezrüeffe: «Säg de dyr Frou nid, dass ig ne sogar föif Napelion underem Aachoufsprys hätt ggä. U no grad eis: Häß ömel de ne gruesami Nacht!»

### *Chrigeli u sys Chroni*

«Jitz hätt i no bald ds Wichtigste vergässe», het Chrigeli zu sym Kathrini gmeint, won er mit em Chroni isch z Märit ggange. Hantli het er ds Chueli a Brunnestock bbunde un isch no hurti sys Tubakpfyffli ga reiche. Ir Stuben uf em Ofe isch es gläge. Är het's i d Burgundertäsche achegstosse u het der gruen-rot Zöttel, wo vom Söifer scho ganz cheschtelebruun isch gsi, la usehange. U druuf sy si dervotrapet, der Chrigeli u sys rot tschäggete Chroni.

Wo si gäge Hözlirain sy cho, het Chrigeli es Pfyffli gstopft u derzue no nes Schübeli vo sym Murtechabis uf d Stockzänd hintere ddrückt. Nachhär sy di beide ume wyters, Chrigi vorab, mit de Händ i de Hoseseck, u hinder ihm nache isch ds Chroni cho z zottle u het albeneinisch am Halftereseili gehäschet. Bim Hohlebedli het Chrigi müesse linggs haa. Der Wäg geit dert bimene chlyne Wäldli verby.

Uf der andere Syte vom Wäldli sy grad es paar Manne dranne gsi, Grien ufzpickle. Derby isch e wältsmordio Findling fürecho. U dä het ewägg müesse. En eltere Maa het es Loch i Stei gmeisslet u Sprängpulver drygschüttet.

«So, uf d Syte, Lüt, d Zündschnuer brönnt!», het er nach eme Rüngli grüeft, un alls isch sech hinder d Böim ga verstecke.

I däm Ougeblick chunt ume Waldegge Chrigeli mit sym Chroni. Ds Chueli het der Chopf la hange u amene Schübel Gras gchaulet, won es underwägs het chönne amene Börtli abrupfe. O Chrigi het vorache gluegt. Ds Pfyffli het nümme grouchnet, u der Zöttel isch wi nes Uhrpändel hin- u härplampet.

Uf der andere Syte vom Wäldli isch d Zündschnuer scho fasch achebbrönnt gsi. Chrigeli u sys Chroni sy ahnigslos näächer cho – won es undereinisch e mordsmörderische Chlapf git u der Findling i d Luft jagt. Es het gchuttet u gsuuset. Chrigi isch zämgfahre u z Tod erchlüpft. Ds Tubakpfyffli isch ihm us em Muul gheit un ufe Boden achetroolet. D Muulegge het er la hange, u d Chnöi hein ihm gschlotteret wi Eschpeloub.

Är chehrt sech um. U was gseht er? Der Hoger zdürab isch i eim Ggaracho sys verschüüchte Chueli i grosse Ggümpe gsatzet. Ds Halftereseili isch ihm zwüsche de Vorderscheichli umegschlängget, u der Schwanz het's höch ufgstellt gha.

Eh, wi het jitz Chrigeli undereinisch aafa wättere u syrache, won er sys Chroni het gseh gäge heizue cheibe – sys rot tschäggete Chueli, won er doch het wölle z Märit bringe! U ds Kathrini, wi het daas grossi Ouge gmacht, wo ds Chroni i gestrecktem Galopp dür d Hoschtet isch cho z techle u vor der Stallüre het aafa brüele – u gly druuf o Chrigi isch cho z chyche u gschwitzt het wi ne Ankebättler. Där guete Frou schiesst's düre Chopf: «We jitz hinderem Chroni un em Chrigi no oppis dritts derhäarchunt, de cha's bigoscht nume der lyhaftig Tüüfel sy!»

Aus «Strouröseli», Barndütschi Gschichte u Gedicht us vergangene Zyte. ISBN 3-85654-902-1